

# La flur-chadaina – mes project

DA SELINA BAYER

■ Jau sun Rumantscha, ma jau sun creschida si en la Bassa. Actualmain sun jau scolara al gimnasi Oberwil ed jau hai creà la pagina [www.flur-chadaina.ch](http://www.flur-chadaina.ch) sco project per mia lavur da matura. Mia mira è da sustegnair la lingua rumantscha e quai tras porscher ina plattafurma per texts da giuvnas e giuvens rumantschs. Mes focus sa drizza surtut vers la giuventetgna ed il scriver en general. Natiralmain datti anc bleras autras pussaivladads per sustegnair la lin-

gua rumantscha, la plattafurma è be inavia pussaivla.

## Pertge il num da la flur-chadaina?

Jau hai tschernì il num «la flur-chadaina» per mia pagina-web perquai che jau chat la flur-chadaina in bel simbol per insatge che sa derasa e crescha en blers lieus. Ins po perfin prender influenza cun derases sems sco la mattetta fa sin la fotografia. Ils sems èn tut quai che sa rimna, ils texts che la giuventetgna rumantscha scriva e ch'jau publitgesch sin «la flur-chadaina». Siond che la pagina-web è

scritta per rumantsch grischun pon ils texts esser scrits en tut ils idioms. «La flur-chadaina» è sco ina chadaina che tegna ensem las diversas furmas da la lingua rumantscha. Jau pens ch'il spiert da cuminanza è impurtant per il mantegniment dal rumantsch.

## La finamira

La mira da mes project è da derasar da nov la lingua rumantscha per ch'ella possa crescer en blers lieus e per ch'ella restia mantegnida. Sustegn per mes project hai jau chattà tar la GiuRu. Uschia hai jau gi la pussaivladad da discurrer davart ils basegns che la lingua avess. Jau hai visità differentas scolas rumantschas en il Grischun. Per mai era quai in'experientscha speziala cunquai ch'jau n'hai betg frequentà in'ura da rumantsch en scola. Là hai jau cuntanschì emprimas auturas ed emprims auturs per texts en rumantsch. Uschia che la pagina cumpiglia gia ina bella quantad da texts en differentas categorias. Sch'insatgi ha er interess da far part cun in agen text u ha ulteriuras dumondas pon ins sa drizzar a: [contact@flur-chadaina.ch](mailto:contact@flur-chadaina.ch)



Inspirà tar il num dal project ha in prà da flurs-chadaina sco quest qua.

MAD